

AWIG - AWIG
DESA PAKRAMAN WONGAYA GEDE



KECAMATAN PENEBEL
KABUPATEN TABANAN
WARSA - 2003

BANTANG AWIG-AWIG DESA ADAT WONGAYA GEDE

	Kaca
MURDHA CITTA	1
PRATHAMAS SARGAH ARAN LAN WEWIDANGAN DESA	1
DWITIIYAS SARGAH PATIHIS LAN PAMIKUKUH	2
TRITIIYAS SARGAH SUKERTA TATA PAKRAMAN	3
Palet 1 Indik Krama	3
Palet 2 Indik Prajuru lan Dulun Desa	6
Palet 3 Indik Kukul	8
Palet 4 Indik Paruman	9
Palet 5 Indik Druwen Desa	11
Palet 6 Sukerta Pamitegep	12
Kaping 1 Karang, Tegal, lan Carik	12
Kaping 2 Pepayonan	13
Kaping 3 Wewangunan	13
Kaping 4 Wewalungan	14
Kaping 5 Bhaya	15
Kaping 6 Panyanggran Banjar	16
CATURTHAS SARGAH SUKERTA TATA AGAMA	16
Palet 1 Indik Dewa Yajnya	16
Palet 2 Indik Resi Yajnya	20
Palet 3 Indik Pitra Yajnya	20
Palet 4 Indik Manusa Yajnya	24
Palet 5 Indik Bhuta Yajnya	24
PANCAMAS SARGAH SUKERTA TATA PAWONGAN	25
Palet 1 Indik Pawiwahan	25
Palet 2 Indik Nyapihan	26
Palet 3 Indik Sentana	26
Palet 4 Indik Warisan	27
SATTAH SARGAH WICARA LAN PAMIDANDA	27
Palet 1 Indik Wicara	27
Palet 2 Indik Pamidanda	28
SAPTAMAS SARGAH NGUWAH-NGUWIJHIN AWIG-AWIG	29
ASTAMAS SARGAH SAMAPTA	30

MURDDHA CITTA
OM AWIGHNAM ASTU NAMA SIDDHAM

Sembah bhakti miwah pengastawan titiang majeng ring Paduka Bhatara-Bhatari sesuwunan titiang sami, riantukan wantuh malarapan panghyangning kalih pawecan Ida Sang Hyang Widhi Wasa asung kertawaranugraha nyresti jagat jangkep rawuhing sadagingnya sami, mawinan wenten kahuripan sekala niskala ring Bhuwana Agung miwah ring Bhuwana Alit. Manut dresta, Desane kamanggehang dados pasayuban Krama Desa rawuhing kulawarga pawongannya sami, mawastu raris Desane kamanggehang pinaka pawakan Bhuwana Agung, pawongannya kamanggehang pinaka pawakan Bhuwana Alit.

Sotaning pawakan Bhuwana Agung, Desane taler kamanggehang pinaka pawakan bhawa mahurip, sane kacirenin antuk wentene pakilit Tri Hita Karana sane nenten dados pasahang, luwire :

- ha. Parhyangan, sahanan parhyangan panyiwian Desa, genah ngarcana bhawan Ida Sang Hyang Parama Wisesa, pinaka jiwana Desane ;
- na. Pawongan, gebogan Krama saha warga Desa maka sami pinaka bayu pramanan Desane, mawinan Desane prasida maolah prawreti ;
- ca. Palemahan, sahananing tanah kakuwuban wewidangan Desa, pinaka stulan Desane.

Adung patemoning Bhuwana Agung ring Bhuwana Alit, maka larapan ngupadi santa jagadhita, punika sinanggeh murddhaning prayojana pangriptaning awig-awig iki, rikala paseban mami Krama Desa Adat Wongaya Gede pinaka sepat siku-siku pamatut miwah pamutus wastu kasidan prayojanan mami kabeh, prasama angidep muwah amageh aken linging awig-awig kadi ring sor iki.

PRATHAMAS SARGAH
ARAN LAN WEWIDANGAN DESA

Pawos 1

- (1) Desa Pakraman puniki mawasta Desa Pakraman Wongaya Gede.
- (2) Jebar kekuwub wewidanganaya mawates nyatur desa :
 - ha. Sisi wetan Yeh Pusut.
 - ha. Sisi kidul Desa Pakraman Penganggahan

- ca. Sisi kulon Yeh Klungah
 ra. Sisi lor Alas Batukaru / Bahad ukur.
- (3) Jebar kekuwub wewidangan sane kawengku antuk wates-wates inucap wenten : 3023.326 ha.
- (4) Sane kamanggehang ngranjing dados kekuwub wewidangan Desa Pakraman puniki, manut dresta, luwire :
 ha. Pupulan karang paumahan sane sinanggeh Palemahan Desa Pakraman ;
 na. Setra, carik miwah tegal sane wenten ring kekuwub wewidangan Desa Pakraman puniki sejabaning Palemahan Desa Pakraman, manggeh ngranjing dados Tlajakan Desa Pakraman Wongaya Gede.
- (5) Desa Pakraman puniki kacpah dados petang Banjar, luwire :
 ha. Banjar Wongaya Kelod
 na. Banjar Wongaya Kangin
 ca. Banjar Wongaya Kaja
 ra. Banjar Wongaya Bendul
- (6) Awig-awig, Pararem miwah sahanan Pasuaran Desa, manggeh kaje jerang ring jebar kekuwub wewidangan Desa Pakraman puniki sami

**DWITIYAS SARGAH
 PATITIS LAN PAMIKUKUH**

Pawos 2

Desa Pakraman Wongaya Gede ngamanggehang pamikukuh, minakadi .

- (1) Pancasila
- (2) Undang-Undang Dasar 1945, pamekas pasal 18,
- (3) Tri Hita Karana, manut sadacara Agama Hindu.
- (4) Hak Asasi Manusia.

Pawos 3

Luwir Patitis Desa Pakraman Wongaya Gede :

- (1) Mikukuhin miwah ngrajegang Sang Hyang Agama
- (2) Nginggilang tata prawretine maagama.
- (3) Ngrajegang kasukertan Desa saha Pawongannya sekala lan niskala.

**TRITYAS SARGAH
SUKERTA TATA PAKRAMAN**

Palet 1

Indik Krama

Pawos 4

- (1) Sahananing sang jenek mapaumahan ring wewengkon wewidangan Desa Pakraman Wongaya Gede sinanggech warga Desa.
- (2) Warga Desa inucap ring ajeng, linggihnyane wenten 2 (kalih) soroh :
 - ha. Warga Desa sane maagama Hindu tur sareng nyungkemin Kahyangan Desa Pakraman Wongaya Gede sinanggech Krama Desa Wongaya Gede.
 - na. Sajaba punika, sinanggech Tamiu, sane kasulurang manut Pararem. ✓

Pawos 5

Dasar Pakraman dados Krama :

- (1) Sahanan Warga Desa sane sampun marabian, patut ngawit dados Krama Desa.
- (2) Satunggil Krama, manut kulawargannya, patut kemi sinalih tunggil ayah-ayah :
 - ha. Ayahan Ngarep
 - na. Ayahan Balu
- (3) Sesengker ngawit tedun ngayah :
 - ha. Marep ring Krama Desa sane mawit saking pawiwahan, ngelaksanayang pawidi-widanan tur sampun kaupasaksi sekala lan niskala polih galah a warsa wawu tedun ngayah.
 - na. Marep ring Krama Desa sane mawit saking ngarangin, kasulurang manut Pararem. ✓
- (4) Krama Desa sane wenang nyada yan sampun kapastika, luire :
 - ha. Sungkan tahunan ;
 - na. Yan sampun mederbe pengentos utawi penyeledi ;
 - ca. Risampun mayusa 55 warsa.

- (5) Sang saking sewosan desa yan sareng tedun makrama desa ring Desa Pakraman Wongaya Gede patut keni batu-batu utawi pamogpog, sane agengnya kasulurang manut pararem.
- (6) Yening wenten krama saking sewosan desa sareng ngranjing makrama desa ring Desa Pakraman Wongaya Gede patut kadulurin antuk surat keterangan sane jangkep.

Pawos 6

Wusan dados Krama Desa, luwire :

- (1) Sangkaning :
 - ha. pinunas ngraga, seda, manawi magingsir linggih saking wewengkon Desa Pakraman Wongaya Gede ;
 - ca. kanorayang, malantaran piwal ring awig-awig miwah Pararem Krama Desa, utawi tan satinut ring pituduh Prajuru sajeroning indik nyapat sikian, minakadi nenten prasida ngeschin prawreti ;
 - ra. tata-titine nitenin wusan dados Krama Desa inucap ring ajeng, kasulurang manut pararem. ✓
- (2) Sang wusan dados Krama Desa tan polih pah-pahan druwen Desa miwah tan polih pasayuban malih sajeroning ala ayu. ✓

Pawos 7 .

Sahananing Krama Desa, patut keni tetegenan utawi ayah-ayah, luwire :

- (1) Ayahan Ngarep, mapiteges paturunan miwah ayahan mamungkul saking Krama Ngarep.
- (2) Ayahan balu, luwire :
 - ha. Balu remban, sane pianaknyane kantung alit-alit, punika keni ayahan balu remban, sane kasulurang manut pararem .
 - na. Balu ngelintik, yan lanang keni ayahan lanang, yan istri keni ayahan istri.
- (3) Ritatkala ngardi wewangunan kabuatan Desa Pakraman, Kramane sejaba keni ayahan manut pawos 7, taler keni paturunan sakadi ring sor :
 - ha. Paturunan samawibhaga manut pararem.
 - na. Dana punia, manut kalascaryan sang madana punia.

(4) Krama Desa, kadadosang :

ha. Mapuangkid utawi tan tedun ngayah / parum :

- 1) Rikala mapawangunan, ngerabin, nangun yajnya, nandur, kaluwasan masengker dewasa ;
- 2) Keni dedawuhan saking Guru Wisesa ;
- 3) Kapialang, luwire : sungkan, matepetin, kalayusekaran, lan sakancan punika.

na. Dados ngwakilang ring jadma tiosan, sane sampun menek daa truna.

ca. Dados mogpog utawi numbas ayahan, prade :

- 1) Dados pegawai Negeri utawi Pegawai Perusahaan Swasta ;
- 2) Magenah ring desa sewosan malantaran ngrereh pakaryan.
- 3) Uger-uger siosan kesalurang malih ring pararem krama banjar.

ra. Dados nyeledi utawi nyuksukin krama ngarep yang sampun mayusa 17 warsa.

Pawos 8

Kapatutan Krama Tamiu :

- (1) Krama Tamiu, patut madana punia ring Desa Pakraman / Banjar, manut pararem.
- (2) Krama Tamiu, patut polih pasayuban marupa pitulung rikanjekan katiben pancabaya.

Pawos 9

Paturunan miwah laluputan :

- (1) Paturunan utawi peson-peson sajeroning ngulati kasukertan Desa Pakraman / Banjar Pakraman, kapitegenang ring Krama Desa / Banjar.
- (2) Desa / Banjar, maweh laluputan ayah-ayah miwah peson-peson ring sang inggiling linggih miwah sang kawelasaran.
- (3) Sor singgih laluputan miwah bacakan sang polih laluputan, kaunggang jeroning pararem.
- (4) Sajawaning prajuru Desa / Banjar, sane taler pastika polih laluputan, luwire :

- ha. Para sadhaka, minakadi Pamangku Kahyangan / Penyiwian Desa / Pemrajan lan panyada ; sane kesulurang manut prarem.
- na. Para serati lan sutri ;
- ca. Sang sungkan tuhanan ;
- ra. Wong cedangga banget ;
- ka. Wong ubuh meme bapa, jantos mayusa 25 warsa.

Palet 2 ✓

Indik Prajuru lan Dulun Desa

Pawos 10

- (1) Desa Pakraman Wongaya Gede kaenter antuk Prajuru Desa Pakraman, kamanggala antuk Bendesa Adat.
- (2) Banjar kaenter antuk Kelihan Banjar Adat, kamanggala antuk Kelihan Banjar Adat utawi Kelihan Adat.
- (3) Tempekan kaenter antuk Kelihan Tempekan.
- (4) Prajuru Desa Pakraman / Banjar, patut :
 - ha. Mawit saking Krama Ngarep utawi Pangele ;
 - na. Ngadegang Prajuru malantaran antuk pemilihan jeroning Paruman Krama Desa / Banjar, nyabran 5 warsa, sajawaning wenten pariindikan tios, tur sang sampun puputing panumaya, kengin kapilih malih apisan ;
 - ca. Maduluran atur piuning ring Pura Desa.

Pawos 11

- (1) Bendesa Adat, karombo antuk :
 - ha. Panyade, pinaka wakil Bendesa Adat.
 - na. Panyarikan, pinaka Juru Surat.
 - ca. Patengen, pinaka Pangemong Druwen Desa.
 - ra. Kasinoman, pinaka Juru Gumencang.
 - ka. Kelihan Banjar sowang-sowang ring Adat Wongaya Gede.
- (2) Sajeroning ngenterang kasukertan kaniskala, Bendesa Adat Wongaya Gede patut masinggihang Pamangku Kahyangan Desa.
- (3) Prajuru Desa taler ngadegang Dulun Desa utawi Panglingsir, sane sinanggeh Kerta Desa, mawit saking Prajuru sane sampun puputing

panumaya, sang wikan ring adat miwah agama. Kepala Desa miwah sane lianan, sane kasulurang manut pararem.

Pawos 12

- (1) Swadharmaning Bendesa Adat, luwire :
 - ha. Ngenterang paruman-paruman Desa ;
 - na. Ngenterang panglaksanaan sadaging awig-awig miwah pamutus-pamutus Krama Desa / Banjar, sane sinanggech Pararem.
 - ca. Ngraksa miwah nudonang tata-titine migunayang sarajabrana druwen Desa
 - ra. Nuntun saha ngenterang Krama Desa rawuhing Warga Desa sami ngupadi kasukertan sekala lan niskala.
 - ka. Nuntun saha nyaksi upacara sangaskaraning kahuripan sane mabuat, minakadi sane ngilitang sulur pakulawargan.
 - da. Nuntun saha ngenterang Warga Desa nginggilang Sang Hyang Agama, kasucian Kahyangan, kesucian Palemahan, kasucian Pawongan, miwah tata-titine migunayang setra.
 - ta. Mawosin miwah niwakang pamutus marep ring wicaran Warga Desa.
 - sa. Ngwakilin Desa, magemuang bebawos ring sapa sira ugi.
 - wa. Lan sane sewosan sane wenten pakilitnya ring Desa.
- (2) Tata-titine ngalaksanayang swadharma inucap ring ajeng, tan maren patut satinut ring daging awig-awig, pararem, dresta miwah pamutus paruman Desa.
- (3) Panglaksanane ring ajeng patut kasiarang ring Desa, Banjar kapungkuripun.
- (4) Sumakuta utawi sumanggup natak pamutus paruman Desa, ngeninin swadharma sowang-sowang Prajuru.

Pawos 13

- Patias utawi olih-olihan Prajuru / Dulun Desa, luwire :
- ha. Luput reramon utawi peson-peson ;
 - na. Luput paturunan marep ring kabuatan Desa / Banjar.

- ca. Polih pah-pahan, upon-upon palaba carik / tegal druwen Desa :
- ra. Patias sewosan manut pararem.

Pawos 14

- (1) Prajuru / Dulun Desa, kapilih nyabran 5 warsa, ngawit saking padiwasane kandegang Prajuru / Dulun Desa.
- (2) Prajuru / Dulun Desa sane swadharmannya sampun puputing senger, kengin kapilih malih a pisan.
- (3) Pari indikan ngadegang Prajuru / Dulun Desa sakaluwire, kapastikayang malarapan Paruman Krama Desa tur kaingkupin antuk Krama.
- (4) Wusan dados Prajuru / Dulun Desa, sangkaning :
 - ha. Lina / Seda ;
 - na. Pinunas ngraga malantaran jalaran sane pastika ;
 - ca. Swadharmannya sampun puputing senger ;
 - ra. Kawusanang / kanorayang olih Krama Desa duaning iwang pamargi manawi nilar sesana.
- (5) Ngentosin, ngwusanang utawi nganorayang Prajuru / Dulun Desa, patut kamargiang sajeroning Paruman Krama Desa tur kaingkupin antuk Krama Desa.

Palet 3

Indik Kukul

Pawos 15

- (1) Dudonan Kukul ring Desa Pakraman Wongaya Gede, luwire :
 - ha. Kukul Desa ;
 - na. Kukul Banjar ;
 - ca. Kukul Sekaa-sekaa utawi Tempekan.
- (2) Kukul Desa, Banjar, kemanggehang pinaka piranti utawi sarana tengeran maka wangsit, ring wewengkon wewidangan Desa, Banjar.
- (3) Tetepakan suaran kukul manut dresta, tur anggah-ungguh tetepakanipun kaunggahang jeroning pararem.

- (1) Kulkul Desa / Banjar, tan wenang katepak yan tan sangkaning pituduh Prajuru, sajawaning tengeran kapancabhayan.
- (2) Sang nepak Kulkul Desa / Banjar, tan sangkaning pituduh Prajuru, patut digelis atur supeksa maka buatan panepakan, yan piwal, sang mamurug wenang katibakin danda, manut pararem.
- (3) Kulkul sekaa-sekaa utawi tempekan miwah kulkul pondokan-pondokan, tan kalugra nyawerin utawi matehin sukat miwah tetepakan suaran kulkul Desa, Banjar ; prade mamurug, sang mamurug taler wenang katibakin danda, manut pararem.

Palet 4

Indik Paruman

Pawos 17

- (1) Dudonan Paruman ring Desa Pakraman Wongaya Gede, Iuwire :
 - ha. Paruman Krama Desa, kawentenang sanistannya apisan jeroning awarsa utawi manut kabuatan, sane kariinin antuk tetibak arah-arah.
 - na. Paruman Padgatakala, rehning wenten indik sane dahat mabuat sane pacang bawosang, sane karihinin antuk tetibak arah-arah.
 - ca. Paruman Krama Banjar, kawentenang nyabran sasih nenten majalaran arah-arah malih, duaning sowang-sowang Banjar sampun maderbe tegak sangkepan sane pastika, manut pararem ring sowang-sowang Banjar.
 - ra. Paruman Prajuru / Dulun Desa, kawentenang manut kabuatan.
 - ka. Paruman sekaa-sekaa, kawentenang manut kabuatan.
- (2) Pamargin Paruman Krama Desa / Banjar, patut nganutin dudonan :
 - ha. Paruman wahu kengin kakawitin sesampune ketedunin antuk pinih kedik kalih pahantiga lintang saking patut ngamiletin, kamanggata antuk tengeran suaran kulkul, mabusana adat Bali, tan kalugra makta gegawan sakaluwire, karihinin antuk ngarcana Bhagawan Panyarikan majalaran widhi widhana lan cane.
 - na. Maka pangawit, kalaksanayang panyacak pangesep, karuntutin antuk nyacak dedosan, wahu kalanturang antuk parum ; mawosang indik druwen desa, lan sane sewosan, sesampune parumane puput.

patut kacacak malih, tur sane kasep, sang ninggal paruman miwah sane nosa, wenang katibakin danda, sane ageng alitipun kasulurang manut pararem.

ca. Sajeroning paruman tan kalugra ngwetuang wak ghora, minakadi ngardi biyuta, sang mamurug wenang keni pamidanda bea pacamil, sakadi dandaning anguman-uman ring paseban, sane kasulurang manut pararem.

ra. Pamutus bebawos sane briuk sapanggul utawi ingkup, punika sane kaaptiyang tur kamanggehang.

- (3) Prade daging peparumane nenten kaingkupin, Prajuru Desa / Banjar mangda ngilikang bebawos, saha pamutusna mangda kararemin antuk krama desa / banjar ; bilih jantos ping tiga taler nenten prasida kaingkupin, Prajuru Desa / Banjar dados nusa bawos ring Kerta Desa nganutin dudonan ; kaingkupin paiguman Prajuru, kaingkupin paiguman Kerta Desa, pinih untat malih katunasang pamutus sajeroning Paruman Krama Desa / Banjar.

Pawos 18

- (1) Sajeroning Paruman Krama Desa, Bendesa Adat patut nyiarang pamargine ngenterang Desa, pamekas ngeninin indik :
 ha. Munjuk lungsuring gehogan pakraman saha ayah-ayahnyane, minakadi sulur arthabrana druwen Desa.
 na. Pangrencanan Prajuru, ngeninin usaha Desane kapungkur.
- (2) Pamutus paruman Krama Desa sane sinanggeh Pararem, kamanggehang maka pamitegep panglaksanaan awig-awig.

Pawos 19

- (1) Paruman Prajuru / Dulun Desa, kawenangan wantah ngricikang pangrencana marep ring usaha Desane kapungkur.
- (2) Paruman Prajuru Desa, tan kawenangan ngamedalang tetegenan ring Krama Desa, sadereng kaingkupin antuk Krama Desa.
- (3) Pamutus Paruman Prajuru / Dulun Desa, kengin ngwetuang pasuara manut daging pituduh sang ngawa rat, utawi ngonekang pamutus sane pecak sampun dados Pararem Krama Desa.

Palet 5
Indik Druwen Desa
Pawos 20

- (1) Sane kamanggehang dados druwen Desa Pakraman Wongaya Gede Iuwire :
 - ha. Kahyangan Desa, Iuwire
 - 1). Kahyangan Tiga : Pura Desa, Pura Puseh, Pura Dalem.
 - 2) Kahyangan druwen Desa sewosan ring Kahyangan Tiga, minakadi : Pura Nyangaluh.
 - na. Wantilan.
 - ca. Tanah tegalan 2 Ha.
Druwen Bale Agung 00,75 Ha, 00,60 Ha, Druwen Desa 00,40 Ha, 00,20 Ha, 0295 Ha.
 - ra. Setra : 0,60 Ha
 - ka. Lembaga Perkreditan Desa (LPD)
 - da. Lelanguwan, minakadi tetabuhan lan ilen-ilen druwen Desa, Iuwire :
 - 1) Ilen-ilen wali ring Pura : rejang, pendet.
 - 2) Lekita-lekita : Pipil utawi sertifikat, awig-awig, pasuara, pararem.
- (2) Olih-olihan Desa Adat Wongaya Gede mawit saking :
 - ha. Upon-upon palaba Pura ;
 - na. Paturunan saking Krama Desa ;
 - ca. Paica saking Guru Wisesa ;
 - ra. Dana punia tiyosan sane patut ;
 - ka. Pah-pahan saking LPD ;
 - da. Olih-olih saking sewosan sane kasulurang manut pararem.
- (3) Sanangken Paruman Krama Desa, Bendesa Adat patut nyiarang munjuk lungsur upon-upon laba pura lan sapanunggalannya sane sinanggeh druwen Desa.
- (4) Upon-upon palaba pura lan sapanunggalannya, kanggen prabea Piodalan miwah wewangunan ring pura, taler prabea tiyosan marep ring kabuatan Desa Pakraman.
- (5) Sakaluwiring druwen Desa patut wenten lekitannya sane pastika.
- (6) Tan kalugra ngadol utawi ngesahang druwen Desa yan tan kacumpuin antuk Krama Desa sami.

Palet 6

Sukerta Pamitegep

Kaping 1

Karang, Tegal, lan Carik

Pawos 21

- (1) Krama Desa sane ngamong karang Desa utawi karang paumahan ngraga patut ngwatesin karangnya sowang-sowang antuk pagehan / turus utawi tembok, mangda pakantennya asri, utamiipun sane ring jaba karang Desa.
- (2) Watese sane mawasta gegaleng kaluan, miwah gegaleng kateben mangda nganutin dresta, tur kakaryanin olih sang negen wates inucap.
- (3) Prade karasayang pagehan / turus inucap nglikadin, yan pada arsa panyandinge, watese kengin nganggen pinget utawi pracihna pal saking Agraria, sakewanten kasaksi antuk Prajuru Desa / Banjar.
- (4) Prade wenten karang kabebeng, mangda kautsahayang wenten pemesuannya sane pastika.

Pawos 22

- (1) Sinalih tunggil Krama Desa / Krama Banjar, nenten kalugra :
 - ha. Ngalah-alah margi, karang desa, tegal ayahan desa, tegal / carik krama lian.
 - na. Ngalah-alah tegak kahyangan, setra, lan sakancan tegak sane sinanggeh suci.
- (2) Prade wenten mamurug kecape ring ajeng, sang mamurug patut ngwaliang tanah inucap, tur sang ngalah-alah tegak suci, tiosan ring ngwaliang tanah tegak suci inucap, taler patut keruntutin antuk dewa danda miwah artha danda, sane kasulurang manut pararem.

**Kaping 2
Pepayonan
Pawos 23**

- (1) Ngawit nandur pepayonan minakadi tanem tuwuh, patut adepa agung ngajeroang saking wates ; pepayonan minakadi tanem tuwuh sane jantos ngliwat wates, wenang kasepatgantungin.
- (2) Pepayonan sane ngungkulin mawastu mayanin ka pisaga, sang nruwenang pepayonan inucap patut kawara tur kairing mapiguman antuk sang rumasa ketetehan, bilih-bilih sang nruwenang, arsa ngrebah utawi notor wit pepayonane punika.
- (3) Pradene sampun kawara taler tan wenten utsahan sang nruwenang, sang rumasa katetehan wenang masadok ring Prajuru, tur risampune kaparitasas kandugi wenten lelugrahan Prajuru, wahu wit pepayonane punika kengin karebah, sakewanten panukun patin wit pepayonane punika patut katahur olih sang rumasa ketetehan manut panglokikan sang nepasin, tur wit pepayonane sane karebah punika, kasukserahang ring sang nruwenang.
- (4) Sang patut keni pamidanda panyangaskara saha prabea manut pararem, marep ring wewangunan sang karubuhin, luwire :
 - ha. Sang nruwenang wit pepayonane sane sinaggeh mayanin, pradene pungkut tur ngrubuhin wewangunan krama tiosan.
 - na. Sang notor, monggol utawi ngrebah taru, tur ngrubuhin wewangunan krama tiosan.
- (5) Krama Desa patut ngamanggehang kawredian tanem tuwuh sane ngawinang Desane asri tur lestari sane kawastanin Bhuta Iilita sane mates klestarian lingkungan hidup.
- (6) Sinalih tunggil krama sane pacang ngrebah papayonan minakadi tanem tuwuh sane ngawinang Desane asri tur lestari, patut masadok ring Prajuru.

**Kaping 3
Wewangunan
Pawos 24**

- (1) Nyabran ngewangun, sowang-sowang krama patut :
 - ha. Masadok ring Prajuru, pamekas marep ring wewangunan sane mapanyaitan minakadi menengin wates ;

na. Ngangge Asta Bhumi miwah gegulak Asta Kosali, sanistannya manut ring patitise ka niskala.

- (2) Prade wewangunane jantos ngayubin ka pisaga, bilih-bilih temboke ring telenging wates, risampun kawara tur kairing mapiguman taler tan wenten utsahan sang nruwenang, kangkat kasadokang ring prajuru ; sesampune kaparitatas tur wenten lelugrahan prajuru, sang nruwenang wenang keni danda manut pararem, tur tembok inucap patut kagubar olih sang nruwenang, sanistannya mangda kakaryanang abangan.

Kaping 4

Wewalungan

Pawos 25

- (1) Sahanan warga desa sane miara wewalungan : bawi, banteng, mangda sayaga nitenin negul minakadi nglogor wewalungannya, mangda nenten ngrusak karang utawi pabianan krama tiosan, bilih-bilih jantos ngranjing ngletehin kahyangan.
- (2) Prade wenten wewalungan malumbar utawi ngeleb tur ngrusak karang utawi pabianan krama sewosan, risampune kawara taler nenten wenten utsahan sang nruwenang, yan wewalungan punika malih ngrusak karang utawi pabianan krama sewosan, wewalungan inucap keni kataban, tur sang nruwenang wenang katibakin danda ngwaliang panukun wit tetanduran sane karusak, saha nahur panchas pepiaran tetabanen, manut panglokikan Prajuru Desa / Banjar.
- (3) Prade wenten wewalungan ngranjing jantos ngletehin genah suci, minakadi kahyangan, pamrajan lan sakancan punika, risampune kaparitatas antuk prajuru, sang nruwenang wewalungan inucap wenang keni dewa danda lan artha danda, agung alit ipun manut kecap sastra agama sane kapikukuh antuk Krama Desa / Banjar.
- (4) Krama Desa patut nyerayanin wewalungan miwah sarwa prani, tan kapatut mademang paksi, nuba ulam, nyetrum ulam lan sakancan punika, pinaka sinalih tunggil utsahan Krama Desa ngardi Bhuta Hita.
- (5) Sang mamurug kecape ring ajeng, wenang keni danda manut pararem.

Kaping 5

B h a y a

Pawos 26

- (1) Bacakan bhaya, luwire : jiwabhaya, arthabhaya, agnibhaya, toyabhaya, lindhubhaya sane ketahipun kawastanin pancabhaya.
- (2) Sinalih tunggil krama sane manggihin prasihna pastika wentene sahanan pancabhaya, patut digelis nepak kulkul tengeran kapancabhayan, tur digelis masadok ring Prajuru.
- (3) Prade Desane kahanan jiwabhaya, Krama Desane patut ngaturang upacara pamahayun Desa manut kecap sastra agama sane kapikukuh antuk krama, tur sang ngawetuang jiwabhaya, katur ring sang ngawawenang.

Pawos 27

- (1) Sinalih tunggil krama sane manggihin prasihna pastika wentene arthabhaya (kamalingan), patut digelis nepak kulkul tengeran pamitulung manut pawos 15 (4) utawi pawos 16 (1) : sang kamalingan patut atur supeksa ring Prajuru : sang kacihnan ngamaling, katur ring sang ngawawenang, maweweh malih patut keni dewa danda lan artha danda manut pararem, yan ipun ngamaling barang druwen Desa sane sinanggeh suci.
- (2) Sowang-sowang krama desa tan kapatut mapailonan ring dusta ; sang kacihnan mapailonan ring dusta patut katibakin danda kadi dandaning maling, sane kasulurang manut pararem.
- (3) Indik ngrereh reramon minakadi daun kelapa, ron, miwah sane seweosan ring pabianan krama tiosan ri kenjekan suwung, kasulurang manut pararem.
- (4) Indik ngranjingin pakubon utawi pakarangan krama sewosan rikala suwung, mawastu raris sang maderbe pakubon utawi pakarangan kaicalan, kasulurang manut pararem.
- (5) Indik ngranjing pakubon utawi pakarangan krama sewosan rikala suwung riantukan wenten pisarat sane mabuat, minakadi mapangarah miwah kabuatan sane lianan, kasulurang manut pararem.

Kaping 6
Panyanggran Banjar
Pawos 28

- (1) Krama Banjar ring sawewengkon Desa Pakraman Wongaya Gede patut sareng nyanggra karya suka-dukan sowang-sowang Krama Banjar.
- (2) Tetibak panyanggrane inucap ring ajeng, kasulurang manut pararem.
- (3) Sowang-sowang Krama Banjar sane pacang nangun karya suka-duka sane mabuat, mangda masadok ring Prajuru.

CATURTHAS SARGAH
SUKERTA TATA AGAMA

Palet 1

Indik Dewa Yajnya

Pawos 29

- (1) Kahyangan-Kahyangan panyiwian Krama Desa Pakraman Wongaya Gede, luwire :
 - ha. Kahyangan Tiga : Pura Desa / Bale Agung, Pura Puseh, Pura Dalem.
 - na. Kahyangan-Kahyangan panyiwian Krama Desa siosan ring Kahyangan Tiga : Pura Nyangaluh, Sad Kahyangan Luhur Batukaru.
- (2) Tegak Piodalan ring sowang-sowang kahyangan inucap ring ajeng kamanggehang sakadi ring sor puniki :
 - ha. Pura Desa / Baleagung ring rahina Buda Umanis Prangbakat.
 - na. Pura Puseh :
 - Puseh Bendul ring rahina Soma Wage Julungwangi.
 - Puseh Wongaya Gede ring rahina Anggara Kliwon Julungwangi.
 - ca. Pura Dalem ring rahina Buda Pon Sungsang.
 - ra. Pura Nyangaluh ring rahina Buda Umanis Tambir.
 - ka. Sad Kahyangan Luhur Batukaru ring rahina Wraspati Umanis Dunggulan.
- (3) Pamargin pangacine ring sowang-sowang kahyangan inucap ring ajeng, manut kecap sastra agama, saha kalaksanayang kanista, madhyama, utama, manut kawentenan krama sane kaingkupin jeroning pararem.

(4) Pamargi pengaci ring Desa Pakraman Wongaya Gede :

- ha. Pura Tlutug ring sasih kapat. X
- na. Ulu Desa ring sasih kelima. X
- ca. Pura Dalem Kahyangan Luhur Batukaru ring sasih kenem nampih kepitu.
- ra. Mapag agin ring sasih keulu.

Pawos 30

- (1) Ring sowang-sowang pura inucap ring ajeng, patut kaadegang Pamangku.
- (2) Pidabdabe ngadegang pamangku, nganutin dudonan :
 - ha. Ngwilang saking turunan utawi ngwaris ;
 - na. Malantaran nyanjan utawi nuhur ring pura sane karerehang Pamangku ;
 - ca. Malantaran kapilih antuk Krama Desa.

(3) Sang tan wenang kaadegang dados Pamangku, luwire :

- ha. Cedangga, luwire : peceng, perot, cungh, lan sapanunggilannya ;
- na. Nandang sakit ila, ayan, buduh miwah pinungkan sane tan keneng tinamban ;
- ca. Sang maderbe parilaksana nenten becik.
- ra. Sapa sira ugi sane nenten kapatutang manut pararem.

(4) Prabea Kapamangkuan :

- ha. Prabean upakara / upacara adiksa widhi utawi ngwintenang Pamangku, kamedalin miwah kalaksanayang antuk Krama Desa ;
- na. Marep ring prabean Pitra Yajnya ring Pamangku, Panyada, Serati, Sutri, yaning seda ri wekas, Krama Desane patut maweh dana punia atiwa-tiwa, manut pararem.

(5) Pamangku, patut ngamanggehang sesana miwah agem-ageman Pamangku.

Pawos 31

Swadharmaning Pamangku, luwire

- ha. Ngenterang upacara piodalan ring kahyangan sane kaempon utawi ring pakubon sowang-sowang krama :

- na. Prade sinalih tunggil Pamangku Kahyangan Desa kapialang utawi cuntaka, kengin nuhur Pamangku Kahyangan Desa tiosan, utawi nuhur sang sulinggih, katitenin antu Prajuru :
- ca. Yan Pamangku kalayusekaran, wenang anglepas swadharma, kasulurang manut paparem :
- ra. Yan Pamangku sampun tigang rahina ngayah ring pura sane kaempon, kancit wenten kulawargannya kalayusekaran, Pamangku inucap tan keneng cuntaka, sakewanten nenten kengin budal selamin piodalan :
- ka. Mungguh tedun ring palinggih-palinggih Kahyangan Desa miwah ngiyasin pralingga-pralingga, manut pamastian Prajuru :
- da. Ngrajegang sesanan Pamangku, manut sekadi gegelaran kepemangkuan.

Pawos 32

- Patias utawi olih-olihan Pamangku, luwire :
- ha. Panyolasan miwah sarin canang rikala muput yajnya ring sowang-sowang pakubon krama ;
 - na. Upon-upon palaba carik miwah tegal, manut pararem ;
 - ca. Luput pakaryan miwah reramon ;
 - ra. Polih apahtigan sarin canang rikala wenten aci / piodalan ring kahyangan sane kaemponin ;
 - ka. Luput saluwiring prabean wewangunan ring kahyangan sane kaemponin manut pararem.

Pawos 33

- (1) Pamangku kagentosin, riantukan :
 - ha. Seda ;
 - na. Pinunas ngraga, menawi kageringan lan sapanunggilannya ;
 - ca. Kawusanang antuk krama, riantukan nilar sesanan Pamangku.
- (2) Tata carane ngadegang miwah ngentosin Pamangku, kasulurang manut pararem.

Pawos 34

Indik Kasukertan Kahyangan, kadudonang sakadi ring sor puniki :

- (1) Sane nenten kalugra nganjing ka Pura, luwire :
 - ha. Sang katiban cuntaka, minakadi sebel ngraga :
 - 1) Sebel kandel ngrajaswala, salami dereng mabersih ;
 - 2) Sebel antuk ngembasang putra, salami hulan pitung, dina ring sang karuron ;
 - 3) Sebel pangantenan, sadereng mabiakala utawi makala-kalaan ;
 - 4) Sebel riantukan kalayusekaran, jantos puputing sengerk sane kaingkupin jeroning parare,
 - na. Makta sahananing bebaktan sane sinanggeh ngletehin, manut kecap sastra agama.
 - ca. Anak alit sadereng mayusa tigang sasih.
 - ra. Sato agung minakadi wewalungan suku pat, sajawaning rikala mapepada.
 - ka. Mabusana sane tan manut kadi tatacaraning ngranjing ka Pura.
 - da. Sadereng polih wak-wakan utawi pituduh saking Prajuru Desa.
- (2) Tata busanane ngranjing ka Pura, kasulurang manut pararem.
- (3) Pratingkahe tan wenang ring Pura, luwire :
 - ha. Masumpah utawi macoran, sajawaning pituduh Prajuru Desa ;
 - na. Ngamedalang wak purusya utawi wak capala ;
 - ca. Mabanyu, makoratan, masesenengan, makolem dados asiki lanang-wadon, nyangsang busana ;
 - ra. Ngias raga minakadi menahang wastra, menahang pusungan lan sakancan punika, sajawaning Pamangku.
- (4) Sewosan ring Pamangku tan kalugra mungguh tedun ring palinggih-palinggih, sajawaning wit saking pituduh Prajuru Desa.
- (5) Sang mamurug kecape ring ajeng, wenang keni sangaskara danda, manut pararem.

Pawos 35

- (1) Yan wenten jadma karawuhan ring Pura boyo saking nyajan tur ngawinang kramane biapara, wenang keni sangaskara danda lan artha danda, sane kasulurang manut pararem.
- (2) Prade Kahyangan Desane kahanan durmanggala minakadi kapancabhayan, Pamangku patut digelis masadok ring Prajuru Desa.
- (3) Indik upakara / upacara pamahayun kadurmanggalan Kahyangan Desa, mapagamel kecap sastra agama, sane kasungkemin olih Krama Desa.

Palet 2

Indik Resi Yajnya

Pawos 36

- (1) Sang pacang madeg pemangku patut masadok ring Prajuru Desa.
- (2) Prajuru Desa patut ngawas lan nitenin tur wenang mialangin, prade kacihnan wenten indik sane tan manut kecap sastra agama, tur sareng nyaksi upakara / upacara kepemangkuan, saha nglantur nyiarang jeroning Paruman Krama Desa tegap rawuhing wates kawenangannya muput yajnya.
- (3) Krama Desa patut madana punia sepemadeg miwah ring panglepas pemangku riwekas, ketuntun antuk Prajuru Desa.
- (4) Pemangku wenang polih leluputan ayahan miwah peson-peson.

Pawos 37

- (1) Sajeroning muput yadnya, pemangku patut ngutamayang muput yajnya ring wewengkon Desa Pakraman Wongaya Gede, sesampune puput, wahu muput yajnya ring wewengkon desa tiosan utawi ka dura desa.
- (2) Krama Desane sami, patut sareng ngawas lan nitenin katuntun antuk Prajuru, mangda sahanan yajnya sane kalaksanayang olih sowang-sowang Krama Desa, kapuput olih pemangku, manut kawenangannya.

Palet 3

Indik Pitra Yajnya

Pawos 38

- (1) Desa Pakraman Wongaya Gede patut sareng nyanggra yan wenten sinalih tunggil krama sane nglaksanayang Pitra Yajnya.
- (2) Tata cara panyanggrane inucap ring ajeng kasulurang manut pararem.
- (3) Dudonan pamargin Pitra Yajnya :
 - ha. Majalaran antuk mendem.
 - na. Majalaran upacara pangabenan utawi palehon .
 - ca. Riwusan ngaben, patut kalanturang malih antuk upacara ngerorasin tur karuntutin malih antuk nglinggihang dewa pitara.

Pawos 39

- (1) Sinalih tunggil krama sane kalayusekaran / atiwa-atiwa, mangda masadok ring Prajuru.
- (2) Swadharmaning Desa / Banjar
 - ha. Kelihan Banjar Adat patut maritatas sang kaduhkitan, napike pacang kapendem, utawi lantur kaabenang.
 - na. Prade kapendem, raris kawentenang pancapak kulkul tengeran kalayusekaran.
 - ca. Panyanggran Krama Banjar selanturnya manut sakadi sane sampun kaunggahang jeroning pararem, jantos pependemane puput.
 - ra. Prade kaabenang, panyanggran Krama Banjar salanturnya, manut kadi daging pararem, jantos pamargin upacaraane puput.
- (3) Tan kalugra nginepang banghang.
- (4) Larangan pependeman miwah palebon ring wewengkon Desa Pakraman Wongaya Gede kaunggahang jeroning pararem.
- (5) Prade wenten kalayusekaran rikala piodalan ring Kahyangan Desa, kengin mendem tan pasadok, tur patut ngrereh galah mamargi rikala wengi.

Pawos 40

- (1) Desa Pakraman Wongaya Gede ngamanggehang indik cuntaka, mapagamel ring Pamutus Mahasabha Parisada Hindu Dharma Indonesia.
- (2) Tatacara nyulurang kacuntakan, mapagamel kecap sastra agama, kaanutang ring drestan desa, sane kaingkupin jeroning pararem.
- (3) Sinalih tunggil krama sane kahanan cuntaka, yan durung utas, tan kalugra nyarubin genah suci druwen Desa miwah druwen sowang-sowang krama.
- (4) Sang mamurug, patut keni sangaskara danda, manut pararem.
- (5) Sengker utas cuntaka manut kawentenannya, kasulurang sakadi ring sor puniki :
 - ha. Kalayusekaran, cuntakannya kaanutang ring drestan desa miwah sastra dresta.
 - na. Ngrajaswala, cuntakannya tigang rahina ngawit saking ngrajaswala, utawi salaming ngrajaswala.

- ca. Ngembasang putra, cuntakannya abulan pitung rahina ngawit saking putrane embas, ngantos katiwakin upakara / upacara tutug kambuhan.
- ra. Karuron, cuntakannya abulan pitung rahina ngawit saking karuron, ngantos katiwakin tirta pamrayascita.
- ka. Pawiwahan, cuntakannya ngantos sampun makala-kalan.
- da. Gamia gamana, cuntakannya ngantos sampun kapalasang, karuntutin antuk mrayascita sikian, Desa Adat miwah Kahyangan Desa.
- ta. Salah timpal, cuntakannya kapuputang manut kecap sastra agama miwah drestan desa.
- sa. Anak istri mobot malantaran lokika sanggraha kandugi nenten ketiwakin upakara / upacara pabiakawonan, cuntakannya ngantos katiwakin upakara / upacara pabiakawonan.
- wa. Anak istri ngembasang putra malantaran lokika sanggraha kandugi pecak nenten ketiwakin upakara / upacara pabiakawonan miwah widhi widhana, cuntakannya ngantos wenten meras anake alit, karuntutin antuk upakara / upacara manut kecap sastra agama.
- la. Sad atatayi, cuntakannya ngantos sampun mrayascita sikian miwah ngesehin prawreti.
- ma. Mamitra ngalang, cuntakannya ngantos katiwakin upakara / upacara pabiakawonan.
- (6) Cuntaka kalayusekaran / kapademan :
- ha. Kapendem, cuntakannya :
- 1) Cuntaka ka Banjar, laminipun tigang rahina wusan mendem, ngantos sampun maprayascita (masepuh).
 - 2) Kulawargannya sajeroning pakarangan manut dresta.
- na. Kaabenang, cuntakannya :
- 1) Cuntaka ka Banjar, manut dresta sane kapikukuh antuk pararem.
 - 2) Cuntakan sang nyambut karya pitra yajnya, manut dresta sane kapikukuh antuk pararem.
- (7) Sang katiben cuntaka, luwire :
- ha. Kalayusekaran, sane cuntaka :
- 1) Sang kalayusekaran .
 - 2) Kulawargannya.
- na. Ngrajaswala, sane cuntaka . sang ngrajaswala.

- ca. Ngembasang putra, sane cuntaka : sang maderbe putra, lanang wiadin istri, utawi yayah renan sang wahu embas.
- ra. Pawiwahan, sane cuntaka : sang mawiwaha, lanang wiadin istri.
- ka. Karuron, sane cuntaka : sang karuron rawuhing lanangnyane.
- da. Gamia gamana, sane cuntaka :
 1) Sang nglaksanayang gamia gamana ;
 2) Desa Pakramannyane.
- ta. Salah timpal, sane cuntaka :
 1) Sang nglaksanayang salah timpal ;
 2) Desa Adatnyane.
- sa. Anak istri mobot malantaran lokika sanggraha kandugi nenten katiwakin upakara / upacara pabiakawonan, sane cuntaka : anake istri sane mobot punika.
- wa. Anak istri ngembasang putra malantaran lokika sanggraha kandugi pecak nenten katiwakin upakara / upacara pabiakawonan miwah widhi widhana, sane cuntaka :
 1) Sang ngembasang putra ;
 2) Putrane sane kaembasang.
- la. Mamitra ngalang, sane cuntaka : sang nglaksanayang mamitra ngalang punika.
- ma. Sad atatayi, sane cuntaka : sang nglaksanayang sad atatayi punika.
- (8) Pamangku tan keneng cuntaka rikala piodalan ring pura, risampune ngalang sasih utawi ngalang tengah, kacirenin antuk sesampune ngawit nitenin karya.

Pawos 41

- (1) Pamargin atiwa-tiwa utawi pangabenan kalaksanayang mapagamel kecap sastra agama miwah dresta.
- (2) Peputusan pangabenan, kasulurang manut pararem.
- (3) Pangingune ring Krama Banjar, kasulurang manut pararem.

Palet 4
Indik Manusa Yajnya
Pawos 42

- (1) Krama Desa minakadi Krama Banjar, patut sareng nyanggra miwah nitenin yan wenten sinalih tunggil krama nglaksanayang Manusa Yajnya sane mabuat.
- (2) Tata cara panyanggrane inucap ring ajeng kasulurang manut pararem.
- (3) Sang pacang nglaksanayang Manusa Yadnya sane mabuat, mangda masadok ring Prajuru.
- (4) Manusa Yadnya inggih punika, upacara-upacara dharmaning kahuripan manusa, ngawit saking patemoning kama bang lan kama petak sajeroning garbha, ngantos kalayusekaran ri wekas.
- (5) Upacara-upacara inucap ring ajeng kamargiang kanista, madhyama, utama, manut kecap sastra agama miwah dresta.

Palet 5
Indik Bhuta Yajnya
Pawos 43

- (1) Desa Pakraman Wongaya Gede patut nyanggra pamargin Bhuta Yajnya, marep ring kabuatan Desa Pakraman Wongaya Gede.
- (2) Pidabdab pamargin Bhuta Yajnya inucap ring ajeng, mapagamel ring kecap sastra agama, kaanutang ring drestan Desa, sane kapikukuh antuk pararem.
- (3) Krama Desa minakadi Krama Banjar sareng nyanggra sinalih tunggil krama sane nglaksanayang Bhuta Yajnya sane mabuat.
- (4) Sang pacang nglaksanayang Bhuta Yadnya sane mabuat, mangda masadok ring Prajuru.

Pawos 44

- (1) Bhuta Yajnya marep ring kabuatan Desa Pakraman minakadi carun sasih miwah sane lianan, kasulurang manut pararem.
- (2) Indik pamargin palelastian utawi makiyis, kasulurang manut pararem.

- (3) Nangken warsa, rikalaning Tilem Sasih Kasanga, patut kalaksanayang Tawur Kasanga, kalanturang antuk Pangrupukan, pinaka cihna nyanggra pangrawuh Nawa Saka Warsa (Tahun Baru Saka) ring pananggal apisan Sasih Kadasa, sane kawastanin Nyepi.
- (4) Rikalaning Nyepi, sowang-sowang Krama Desa patut ngamargiang Catur Brata Panyepian, inggih punika :
- ha. Amati Geni : tan kengin maapi-api ;
 - na. Amati Karya : tan kengin nyambut karya .
 - ca. Amati Lelanguan : tan kengin maoneng-onengan, ngwijilang suara ghora, nabuh gegambelan, lan sakancannya.
 - ra. Amati lelungan : tan kengin malelungayan manut pararem.
- (5) Catur Brata Panyepian punika kamargiang saking semeng jantos benjangne ngedas rahina.
- (6) Mangda pamargin Catur Brata Panyepian punika trepti, patut katilikin antuk tetelik Desa sane kawastanin Pacalang Desa, tur sang mamurug patut katiwakin pamidanda, sane kasulurang manut pararem.
- (7) Benjangne ring pananggal ping kalih sasih Kadasa, kawastanin Ngembak Geni, sowang-sowang krama patut saling ngaksamayang sane kawastanin Dharma Santi.

**PANCAMAS SARGAH
SUKERTA TATA PAWONGAN**

Palet 1

Indik Pawiwahan

Pawos 45

- (1) Krama Desa minakadi Krama Banjar, patut sareng nyanggra miwah nitenin sinalih tunggil krama sane nglaksanayang pawiwahan.
- (2) Pamargin Pawiwahan, luwire :
- ha. Malantaran pepadikan .
 - na. Malantaran ngrorod utawi marangkat (ngrangkat) ;
 - ca. Malantaran nyentana utawi nyentana nyeburin.
- (3) Indik Pawiwahan, Desa Pakraman Wongaya Gede ngemanggehang Undang-Undang Perkawinan Nomor 1 Tahun 1974, miwah Peraturan Pemerintah Nomor 9 Tahun 1975, Indik Pawiwahan.

- (4) Tata cara pelaksanaannya, mapegamel ring kecap sastra agama, kanutang ring dresta Desa, sane kapikukuh sajeroning pararem.
- (5) Sinalih tunggil krama sane pacang nglaksanayang Pawiwahan mangda masadok ring Prajuru.

Palet 2

Indik Nyapihan

Pawos 46

- (1) Prajuru Desa minakadi Prajuru Banjar, wenang sareng mawosin miwah nitenin yan wenten sinalih tunggil krama sane mapikarsa pacang palas marabi, gumanti nenten kadurusan dados nyapihan.
- (2) Yan krama inucap kukuh ring pikarsannya, Desa Pakraman minakadi Banjar Adat, nenten sumakuta ring pamarginnya.
- (3) Saderenge pastika polih pamutus saking sang ngawawenang minakadi Sang Rumawos (Pengadilan Negeri), krama inucap manggeh keni tetegenan krama, sakadi nguni.
 - Yening wenten krama sampun mapikuren palas, malih mapikuren ring genah ipun duk nguni, mangda masadok ring Prajuru.
 - Yening sang mapikuren nenten adung ring sajeroning mapikuren gumanti nyala, sane mawak purusa mangda masadok ring Prajuru. Yang sampun asasih, Prajuru wenang mawosin sang sane maderbe biyuta.

Palet 3

Indik Sentana

Pawos 47

- (1) Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang sentana.
- (2) Indik sentana, Desa Pakraman wongaya Gede ngamanggehang uger-uger jagat minakadi kawicaksanan sang maraga Guru Wisesa, kaanutang ring drestan desa, sane kapikukuh antuk pararem.
- (3) Sang pacang ngrereh sentana, mangda masadok ring Prajuru.

Palet 4

Indik Warisan

Pawos 48

- (1) Prajuru Desa minakadi Prajuru Banjar wenang sareng mawosin miwah nitenin yan wenten sinalih tunggil krama sane ngindikang warisan.
- (2) Indik Warisan, Desa Adat Wongaya Gede ngamanggehang uger-uger jagat minakadi kawicaksanaan sang maraga Guru Wisesa, kaanutang ring drestan desa, sane kapikukuh antuk pararem
- (3) Sang pacang ngindikang arisan, mangda masadok ring prajuru.

SAT SARGAH

WICARA LAN PAMIDANDA

Palet 1

Indik Wicara

Pawos 49

- (1) Sane wenang mawosin wicara ring wewengkon Desa Pakraman Wongaya Gede inggih punika Prajuru Desa maka miwah Dulur Desa sane kawastanin Kerta Desa.
- (2) Prade sang mawicara tan cumpu ring Pamutus Kerta Desa, kengin nunasang ring Sang Rumawos.
- (3) Sahanan wicara sane mawit saking kacorahan sakaluwire sane sinanggeh nungkasin daging awig-awig, pasuara miwah pararem Desa / Banjar, patut digelis kabawosin olih prajuru, nenten nyantos pasadok malih.
- (4) Sajaba wicara sakadi ring ajeng, patut nyantosin pasadok sang nunas bawos.
- (5) Panepase mangda pastika nyantenang iwang patut malarapan Tri Pramana, inggih punika : saksi, likita, bukti, tur panepase tan maren nepek ring Catur Dresta.

Palet 2
Indik Pamidanda
Pawos 50

- (1) Desa / Banjar Pakraman wenang nibakang pamidanda ring warga Desa / Banjar Pakraman sane sisip.
- (2) Tetibak pamindanda inucap ring ajeng, kalaksanayang olih prajuru.
- (3) Bacakan pamidanda, luwire :
 - ha. Ayahan panukun kasisipan ;
 - na. Artha danda saha panikelnya, miwah panikel paturunan ;
 - ca. Rerampagan ;
 - ra. Kanorayang ;
 - ka. Panyangaskara ;
 - da. Kawusanang makrama.
- (4) Pamidanda sane katiwakang, patut masor singgih, manut kasisipan.
- (5) Jinah utawi arthabrana pamidanda, ngranjing dados druwen Desa / Banjar.

Pawos 51

- (1) Krama sane langkungan ring tigang paruman nglantur nenten nahur paturunan miwah dedandan, wenang karampag.
- (2) Tetibak rerampagan, nganutin tatacara sakadi ring sor puniki :
 - ha. Kalaksanayang olih Prajuru, kasarengin antuk krama pinih kedik tigang diri, pinih akeh limang diri, maka saksi.
 - na. Sang ngrampag patut madarsana rikala ngambil barang minakadi nyawenin tanem tuwuh, sane ageng pangargannya manut ring utang sang karampag.
 - ca. Prajuru patut miteketang mangda barang-barang sane karampag punika digelis katebus masengker awuku, tur ring kutus rahinane pacang kalelang utawi kaadol, yening sang sane karampag sungkan rahat, kantun dados kaungkurang.
 - ra. Tan kengin ngrampag saluwiring barang sane patut inggilang manut kecap sastra agama, miwah mademang pangupajiwane sang karampag.

Pawos 52

- (1) Prade sang pacang karampag mialangin pamargin rerampagan inucap, mawastu sampun tan nganutin daging awig-awig, krama inucap wenang kanorayang.
- (2) Yan krama inucap manggeh piwal yadiyastun sajeroning makudang-kudang paruman sampun kawehin patinget sakewanten manggeh piwal, tan wenten pamargi sewos, sajawaning krama inucap kawusanang makrama Desa / Banjar.
- (3) Rerampagan inucap ring ajeng kabawos buntas, risampun sang kenirerampagan punika :
 - ha. Nunas gengrena sinampura ring ajeng Krama Desa / Banjar, riantukan piwal ring pasubaya sane pecak sampun kararemin.
 - na. Nahur pangarga panguwak pasubaya sadaweg pacang karampag, kadulurin antuk prayascita.

SAPTAMAS SARGAH NGUWAH-NGUWUHIN AWIG-AWIG

Pawos 53

- (1) Nguwah-nguwuhin Awig-awig Desa puniki, wantah kengirin kalaksanayang antuk Paruman Krama Desa.
- (2) Pakarsane nguwah-nguwuhin punika, mangda mawit saking pakarsan Krama Desa, yadiyastu kamedalang antuk sinalih tunggil prajuru utawi sinarengan.

Pawos 54

- (1) Sakaluwiring indik sane sampun kamargiang sadereng awig-awig puniki kasurat, mangda kaanutang ring sadaging awig-awig puniki.
- (2) Sakaluwir sane durung kasurat sajeroning awig-awig puniki, menawi kangkat kanggen mitegepin awig-awig puniki, pacang kasurat jeroning Pararem.

ASTAMAS SARGAH

S A M A P T A

Pawos 55

- (1) Awig-awig puniki kawastanin Awig-awig Desa Pakraman Wongaya Gede.
- (2) Awig-awig puniki kamargiang ngawit kaingkupin utawi kararemin.

Pawos 56

- (1) Awig-awig puniki kararemin duk rahina
Wuku _____, pananggal / pangelong ping _____ sasih
Isaka Warsa _____ tanggal _____
magenah ring _____
- (2) Awig-awig puniki kalinggatanganin antuk Bendesa Adat Wongaya Gede miwah olih sang ngawawenang manut kawenangannya sowang-sowang, tur kapikukuh antuk Murdhaning Pamikukuh : Bupati Kepala Daerah Tingkat II Tabanan.



uwir sang nginggatanganin :
Bendesa Adat Wongaya Gede

4 Sept 2003

WAYAN SUDANA

2). Kelihan Banjar Adat Wongaya Kaja



3). Kelihan Banjar Adat Wongaya Bendul



KETUT SUIRJA

4). Kelihan Banjar Adat Wongaya Kelod

I NYOMAN DEBES

5). Kelihan Banjar Adat Wongaya Kangin




Saksi-saksi :

1.) Kelian Banjar Dinas Wongaya Kaja,


I GEDE KETUT SUTIAMA

2.) Kelian Banjar Dinas Wongaya Bendui,


I WAYAN SURATA

3.) Kelian Banjar Dinas Wongaya Kelod,


I WAYAN WANJANA

4.) Kelian Banjar Dinas Wongaya Kangin,


I NENGAH DARKA


5.) Kepala Desa Wongaya Gede,


I GEDE MANU ARDANA

6.) Ketua BPPD Kecamatan Penebel,


IDA BAGUS NILEN WIJAYA, S. AG

7.) Camat Penebel,


IGST. AG. RAIDWIPAYANA, S.Sos.

Kawikanin olih :

1.) Ketua BPPLA Kabupaten Tabanan,


DRS. I WAYAN DJAPA


DRS. I MADE SAMBA

Kantor Departemen Agama
 DEPARTEMEN KEMENTERIAN AGAMA
 KANTOR KABUPATEN TABANAN
 DRS. Y. WAYAN YUDHA

Murdhaning Pamikukuh,
 Bupati Tabanan,

BUPATI
 N. ADI WIRYATAMA, S.SOS

Mengetahui dan telah dicatatkan tanggal 10-9-03 Register No. 189/34/HK
 Kepala Bagian Hukum Setda Kabupaten Tabanan

PEMERINTAH KABUPATEN
 SETDA
 IGA. PT. SUMARPATNI, SH

SUSUNAN PANITIA PENYURATAN AWIG - AWIG DESA PAKRAMAN WONGAYA GEDE

- I. Pelindung : 1. Idt. Gede Jro Kubayan
2. Kepala Desa Wongaya Gede
- II. Pembina : 1. I Gede Mastera
2. I Gede Badra
3. I Nengah Subada
- III. Ketua Panitia : Bendesa Adat Wongaya Gede
Wakil Ketua : I Made Mudita
Sekretaris : 1. I Made Sugita
2. I Ketut Nuastera
- Bendahara : I Made Megayana
- Pembantu² : 1. I Ketut Arjana
2. I Nengah Wiarka
3. I Wayan Subarta
4. I Ketut Murtika
- IV. Kelompok - Kelompok :
1. Sukerta Tata Pakraman :
- K e t u a : I Nyoman Nurtaya
Sekretaris : I Made Aryadarma
Anggota : a. I Gede Wirya
b. I Nengah Sidia
c. I Gede Ketut Asmara
d. I Wayan Jurya
e. I Gede Sukanita
f. I Wayan Wianjana
g. I Nyoman Debes
h. I Nengah Winarta
i. I Nyoman Wiarna
j. Ni Wayan Leci
k. Ni Ketut Yastini
l. Ni Made Simbit
2. Sukerta Tata Agama :
- K e t u a : I Made Donder
Sekretaris : I Ketut Darti S.Ag.
Anggota : a. I Ketut Wartika
b. I Gede Ketut Bagiarta

- c. I Wayan Pastika
- d. I Wayan Djimar
- e. I Ketut Murjana
- f. I Ketut Sutarka
- g. I Nengah Darka
- h. I Ketut Artawan
- i. I Wayan Astika
- j. Ni Made Serimin
- k. Ni Made Witri
- l. Ni Wayan Sulatri (Men Nuarta)

3. Sukerta Tata Pawongan :

- K e t u a : I Nyoman Arya Darma
Sekretaris : I Ketut St eta
Anggota : a. I Nyoman Jurka
 b. I Ketut Sanggera
 c. I Ketut Rugeg
 d. I Nyoman Berata
 e. I Made Surug Adi Putra
 f. I Gede Ketut Sutiana
 g. I Wayan Degeg
 h. I Wayan Suarta
 i. I Made Agung Parwana Putra
 j. Ni Wayan Sumadri
 k. Ni Ketut Kapar (Men Subagia)
 l. Ni Nyoman Parki

4. Wicara lan Pamidanda :

- K e t u a : I Gede Suparta
Sekretaris : I Gede Sukadana
Anggota : a. I Nengah Kujik
 b. I Wayan Sujana
 c. I Nyoman Tarma
 d. I Nyoman Sukarta
 e. I Made Dasi
 f. I Ketut Edy Sumatra
 g. I Made Suita
 h. I Wayan Surata
 i. I Nyoman Sugiarta
 j. I Wayan Surajana
 k. I Wayan Suarka
 l. Ni Wayan Semudri
 m. Ni Wayan Masning (Men Rus)
 n. Ni Nyoman Serigeg (Men Pus)

- c. I Wayan Pastika
- d. I Wayan Djimar
- e. I Ketut Murjana
- f. I Ketut Sutarka
- g. I Nengah Darka
- h. I Ketut Artawan
- i. I Wayan Astika
- j. Ni Made Serimin
- k. Ni Made Witri
- l. Ni Wayan Sulatri (Men Nuarta)

3. Sukerta Tata Pawongan :

- K e t u a : I Nyoman Arya Darma
Sekretaris : I Ketut St eta
Anggota : a. I Nyoman Jurka
 b. I Ketut Sanggera
 c. I Ketut Rugeg
 d. I Nyoman Berata
 e. I Made Surug Adi Putra
 f. I Gede Ketut Sutiama
 g. I Wayan Degeg
 h. I Wayan Suarta
 i. I Made Agung Parwana Putra
 j. Ni Wayan Sumadri
 k. Ni Ketut Kapar (Men Subagia)
 l. Ni Nyoman Parki

4. Wicara lan Pamidanda :

- K e t u a : I Gede Suparta
Sekretaris : I Gede Sukadana
Anggota : a. I Nengah Kujik
 b. I Wayan Sujana
 c. I Nyoman Tarma
 d. I Nyoman Sukarta
 e. I Made Dasi
 f. I Ketut Edy Sumatra
 g. I Made Suita
 h. I Wayan Surata
 i. I Nyoman Sugiarta
 j. I Wayan Surajana
 k. I Wayan Suarka
 l. Ni Wayan Semudri
 m. Ni Wayan Masning (Men Rus)
 n. Ni Nyoman Serigeg (Men Pus)